

## Der xxvii. Artickel. Vom vberschlahen vnd vor- messen der Massen.

**S**eine Zeche ihren Schacht beleet / kübel vnd seyl einwirfft / vnd die Gewercken am Bergkmeister bege- ren / ihre Massen zu vberschlahen / vnd zuuormessen / das sol er nicht weygern / Vnd wo sich im vber- schlahen / nicht volle Massen ergeben / vnd sich auff ein wehre nicht erstreckt / Sol der Bergkmeister / sol- che vberschar bey den nechstliegenden Zechen / zugleich austheylen Wo aber ein wehr / oder darüber ist / das sol der Bergkmeister / son- derlich vorleyhen.

Eher dann der Bergkmeister vormisset / sol er / wu / wem / vnd wen / er vormessen wil / solches vierzehen tage zuuorn / durch eynen brieff öffentlich anschlahen / vnd vor der Kirchen ausruffen lassen / einem jeden / beme es belanget / darnach zurichten.

## Der xxviii. Artickel. Vom schweren zum vermessen / vnd vorgehen der schnur vnd Lochsteynen.

**W**enn der Bergkmeister / mit den Geschwornen / auff's gebirge köhmen / zuuormessen / sol nach auffgelegter belehenung / der Lehentregere / oder wo der nicht vorhanden / der Vorsteher der zechen einer eynen leiblichen Eidt / mit auffgehobenen fingern / schweren / das der gangt / darauff er vermessen wil lassen / sein rechter belehenter gangt sey / Vnd das er seine Fundgrub oder Masse / auff demselben / vnd auff keynem andern gangt / laut seiner belehenung / vermessen nehmen wil.

Nach gethanem Eydt / sol der Bergkmeister / nach altem bergkwercks brauch / mit der Schnur anhalten / vnd dem Lehen- treger / oder Vorsteher (welcher alle wege der schnur vorgehen sol) nachgehen / Vnd also nach vbllichem bergkwercks brauch / ge- bürliche mass / als einer Fundgruben xliij. lachter / vñ einer Massen xxviij. lachter felde / vermessen vnd geben / vnd volgendes durch die Geschworne / verlochsteynen lassen.

Nach